

orang-orang yang tidak memberi kenyataan yang benar atas keadaan dirinya. Perkara ini kita tidak bawa di sini.

Tetapi perkara yang mustahak sekarang ialah mengapa Majlis Penasihat Kerajaan, sebagai sifatnya sebuah badan tempat kerajaan meminta nasihat mengenai perkara-perkara agama hanya memejamkan matanya selama setahun lebih – tidak berani membantah atau menasihati kerajaan supaya hukum-hukum yang dibuat ke atas orang-orang Islam mestilah dipersesuaikan dengan kelulusan syarak – tidak diadakan hukum-hukum yang bertentangan dengan syarak atau hukum-hukum yang dibuat melawan atau menghalang perkara-perkara yang diluluskan oleh syarak, atau perkara-perkara yang boleh merampas hak-hak yang diluluskan oleh Tuhan atau diberi oleh Tuhan kepada mereka.

Di dalam soal-soal seperti ini, tidaklah seyogianya Majlis Islam Penasihat Kerajaan mendiamkan dirinya kerana sekiranya orang-orang awam tahu akan hal ini tentunya kelak akan menarik atau boleh menimbulkan kemarahan mereka.

Kitab-kitab atau Buku-buku Agama

Kekurangan kitab-kitab agama di dalam bahasa Melayu masa ini terasa benar. Dalam seminar yang dianjurkan oleh Dewan Bahasa Persekutuan Bahasa Melayu Universiti Malaya, hal ini telah nampak. Hajat kepada buku-buku agama yang baik dan lengkap, daripada semua hal, terutamanya mengenai hukum-hukum fikah, sangat terasa kurangnya kerana sekalipun kitab-kitab dalam bahasa Melayu mengenai persoalan ini ada tetapi bahasanya adalah sangat-sangat sukar dan mengurangkan kegemaran peminat-peminatnya membacanya terutamanya golongan-golongan yang muda.

Melihat kepada perkembangan penerbit-penerbitnya yang ada sekarang, dan melihat pula kepada kemahuan pemimpin-pemimpin melaksanakan dasar bahawa agama Islam agama rasmi Persekutuan Tanah Melayu, maka tentunya kemahuan untuk mengadakan buku-buku

agama itu adalah sangat besar terutamanya daripada golongan ahli agama sendiri.

Ahli-ahli agama, terutamanya angkatan mudanya, menyedari akan kekurangan buku-buku agama sebagai panduan hidup di dalam masyarakat orang Melayu yang beragama Islam. Mereka memandang kerja ini adalah sebagai satu jihad tetapi persoalan yang timbul sekarang bukannya kemahuan atau usaha pada mengadakan buku itu tidak ada tetapi pengarang-pengarang atau penerbit-penerbit tidak terjamin bahawa usahanya itu akan berhasil.

Daripada pengalaman yang ada, maka buku-buku agama yang dicetak sebanyak 3,000 naskhah biasanya tiga empat tahun baharu dapat habis terjual. Dengan keadaan yang seperti ini maka usaha menerbitkan buku-buku atau kitab-kitab agama adalah dengan sendirinya berkurang, dan akhirnya untuk menerbitkan buku-buku agama yang berguna bagi masyarakat itu dibuat sambil-sambilan sahaja – tidak lagi dibuat bersungguh-sungguh.

Dengan kerana kurang mendapat sambutan maka kitab-kitab agama kurang diterbitkan. Jauh sekali daripada adanya penerbit-penerbit yang akan berusaha menerbitkan kitab-kitab agama yang berharga dengan sebab jangkakan modal menerbitkannya balik bahkan kebanyakannya usaha-usaha yang demikian menghadapi kerugian. Kerana itu buku-buku agama yang baik di Tanah Melayu boleh dihitung dengan jari sahaja. Sekalipun ada yang bersedia bekerja, namun memandang kepada keadaan seperti ini usaha umum kepada jalan ini akhirnya menghadapi jalan buntu.

Akibat daripada kejadian ini adalah merugikan umat Islam. Perkembangan Islam tidak dapat meluas dijalankan. Pengertian agama yang luas tidak dapat diterangkan. Dan masyarakat agama akan terus menghadapi kekurangan. Kekurangan itu dengan sendirinya pula merugikan kepada

masyarakat Islam dan kepada perkembangan Islam.

Dengan kekurangan itu pula maka tidaklah bererti pengakuan kerajaan bahawa agama rasmi bagi Persekutuan Tanah Melayu agama Islam.

Untuk penggalak atas usaha dalam mengadakan kitab-kitab agama yang baik dan berisi dengan cara ilmiah tidak lain jalannya selain daripada kerajaan menerusi Dewan Bahasa mengadakan subsidi ataupun lain-lain cara bantuan yang tidak tepat untuk menggalakkan usaha mengadakan kitab-kitab berbahasa Melayu yang baik. Dengan dua cara inilah sahaja rasa kekurangan di dalam kitab-kitab agama dapat diatasi. Kita berharap kiranya pihak kerajaan memerhati hal ini dan mencari jalan menjauhkan kekurangan-kekurangan yang dihadapi oleh masyarakat.

Berita-berita Mengenai Khalwat

Di dalam beberapa bulan ini, Pejabat Agama Selangor telah mengambil langkah ke atas orang-orang yang didapati berkhawat. Beberapa orang telah pun dihadapkan ke Mahkamah Syariah di Kuala Lumpur yang mempunyai kuasa sebagai Mahkamah Majistret untuk menjatuhkan hukuman-hukuman ke atas orang-orang yang melanggar kesalahan-kesalahan yang bersangkutan dengan hukuman atau undang-undang Jabatan Agama di negeri itu.

Hukuman-hukuman telah pun dijalankan oleh Mahkamah Syariah itu mengikut dasar-dasar undang-undang yang dibina kerananya. Ini adalah sebaik-baiknya supaya undang-undang itu berjalan atau dijalankan kuatkuasanya tetapi ada seperkara yang nampaknya tidak pun mendapat perhatian kerajaan ialah atas perbuatan-perbuatan akhbar menyiarkan gambar-gambar

orang-orang yang dituduh dan sedang dibicarakan oleh mahkamah.

Perkara yang semacam ini adalah memalukan atau mengaibkan kepada orang-orang yang berkenaan. Sepanjang yang kita ketahui, bahawa menurut peraturan-peraturan mahkamah di negeri ini bahawa suatu perbicaraan yang berjalan atau sedang dijalankan, tidak boleh diberi ulasan atau tidak boleh menyebarkan gambar-gambar orang-orang yang berkenaan atau orang-orang yang dituduh sebab yang demikian ini adalah mengacau atau mencampuri perkara-perkara mahkamah (*contempt of court*)

Selain ini, perkara tuduhan kepada khalwat itu, kalau disiarkan gambarnya adalah membawa kepada aib terhadap diri orang itu dan sekalipun ia bersalah adalah tidak molek sekali-kali gambar-gambar mereka disiarkan seolah-olah ia menjadi suatu hukuman ((mempertontonkan mereka di hadapan khalayak ramai)) seperti perkara-perkara yang berlaku dengan sewenang-wenang pada masa yang lalu.

Kita berharap kerajaan Persekutuan terutamanya Menteri Kehakiman mengawal keadaan peribadi seseorang daripada disiarkan di khalayak ramai dengan menyiarkan gambar-gambarnya itu sebab ini bukannya sahaja memalukan kepada mereka bahkan memalukan pula kepada masyarakat Islam. Semoga hal ini mendapat perhatian dengan segera iaitu supaya kerajaan dengan segera memperingatkan akhbar supaya jangan memperbuat seperti ini – dan menjalankan perintah-perintah supaya jangan terjadi pelanggaran atas mencampuri perkara-perkara mahkamah.

